



Adresa: Ul. Hamdije Čemerlića 39a
71000 Sarajevo
<http://www.voda.ba>

tel. +387 33 726 400
fax. +387 33 726 423
e-mail: info@voda.ba

Broj: UP-1/21-1-40-027-5/24

Datum: 20.02.2024. godine

„Agencija za vodno područje rijeke Save“ Sarajevo rješavajući po zahtjevu Investitora JKP „Komunalac“ d.o.o. Tuzla za izdavanje prethodne vodne saglasnosti u svrhu izrade projektne dokumentacije za aktivnosti na izgradnji nove sanitarne plohe za buduće odlaganje komunalnog otpada na deponiji „Desetine“, Grad Tuzla, na osnovu člana 109. stav (1) tačka 11. i stav (2) tačka 1. Zakona o vodama („Službene novine Federacije BiH“, broj 70/06) i člana 200. stav (1) Zakona o upravnom postupku („Službene novine Federacije BiH“, broj 2/98, 49/99 i 61/22), donosi:

RJEŠENJE

o prethodnoj vodnoj saglasnosti

1. Podnosiocu zahtjeva JKP „Komunalac“ d.o.o. Tuzla daje se prethodna vodna saglasnost u svrhu izrade projektne dokumentacije za aktivnosti na izgradnji nove sanitarne plohe za buduće odlaganje komunalnog otpada na deponiji „Desetine“, Grad Tuzla, a u postupku pribavljanja urbanističke saglasnosti i okolinske dozvole.
2. Prethodna vodna saglasnost može se koristiti isključivo za potrebe izdavanja okolinske dozvole i urbanističke saglasnosti.
3. Prethodna vodna saglasnost izdaje se na određeno vrijeme, sa rokom važenja od tri godine od dana njene pravosnažnosti, ukoliko u tom roku ne bude podnesen zahtjev za izdavanje vodne saglasnosti, a ista se može izmijeniti u zakonom propisanim slučajevima.
4. Prethodna vodna saglasnost se daje na osnovu pregleda dokumentacije, utvrđenog činjeničnog stanja i pod slijedećim uslovima:
 - 4.1. Izraditi investiciono tehničku dokumentaciju za pribavljanje vodne saglasnosti za aktivnost koja može privremeno ili trajno degradirati kvalitet vode ili ometati poboljšanje njihovog postojećeg kvaliteta u postupku formiranja sanitarne plohe za odlaganje komunalnog otpada na deponiji „Desetine“, Grad Tuzla.
 - Investiciono-tehnička dokumentacija treba biti urađena od strane pravnog lica koje ima ovlaštenje (lista „A“) pribavljeno od strane Federalnog ministarstva poljoprivrede, vodoprivrede i šumarstva koja treba da obradi sva pitanja definisana članom 5. stav (2) Pravilnika o sadržaju, obliku, uslovima, načinu izdavanja i čuvanja vodnih akata („Službene novine Federacije BiH“, broj: 31/15, 55/19, 41/20, 63/22) koja su bitna za konkretan slučaj, a naročito:
 - 4.1.1. Kompletan proračun bilansa voda sa platoa na kojem će se vršiti deponovanje komunalnog otpada uključujući sve oborinske vode sa vlastitih i gravitirajućih prostora, procjedne vode, evaporaciju i dr., količinu i sastav očekivanih procjednih voda iz/sa deponija, tehnologiju obrade voda, te količinu, sastav i način zbrinjavanja mulja zaostalog nakon obrade.
 - 4.1.2. Tehničko rješenje prikupljanja i tretmana otpadnih voda sa predmetne lokacije sa svim potrebnim proračunima i tehničkim opisom sa definisanim načinom ispusta prečišćenih voda u recipijent ili dr.
 - 4.1.3. Dati osnovne podatke o recipijentu/ima, sa detaljima ispusta prečišćenih voda u isti. Lokalizet ispusta prečišćenih voda mora biti naznačen na situaciji adekvatne razmjere, kao i mjesto vršenja monitoringa prečišćenih voda.

4.1.4. Tehničko rješenje drenažnih sistema i sakupljanja procjedne vode s njenim tretmanom na uređaju za prečišćavanje procjednih voda te ispuštanjem prečišćenih voda u definisani recipijent ili povrat efluenta na tijelo deponije ili zahvatanja efluenta iz lagune te odvoz na trajno zbrinjavanje od strane ovlaštenog pravnog lica.

4.1.5. Prijedlog programa monitoringa procjednih voda, površinskih voda na predmetnom lokalitetu.

4.1.6. Prije ispuštanja prečišćenih voda u recipijent potrebno je izgraditi okno za monitoring - reviziono okno.

4.1.7. Tehničko-tehnološke mjere koje će spriječiti kontaminaciju voda, tla i zraka. Radove na izgradnji nove sanitarne plohe za buduće odlaganje komunalnog otpada na deponiji „Desetine“, Grad Tuzla uskladiti sa principima, propisima i standardima EU, te sa propisima i zakonima BiH tj. Federacije BiH prema principima savremene multibarijerske zaštite.

4.1.8. Treba biti priložena karta šireg područja, sa ucrtanom mrežom monitoring mjesta i prikazom rezultata do sada obavljenih ispitivanja kvalitativnih i kvantitativnih karakteristika voda (površinskih voda i podzemnih voda).

4.1.9. Definirati da se opasni materijal i otpad ne smiju ni privremeno odlagati na česticu „vodno dobro“, odnosno u vodotoke i na njegove obale.

4.2. Usvojenim sistemom prečišćavanja otpadnih voda treba se obezbijediti da kvalitet istih, a prije ispuštanja u recipijent, zadovolje granične vrijednosti utvrđene u Uredbi o uslovima ispuštanja otpadnih voda u okoliš i sisteme javne kanalizacije („Službene novine Federacije BiH“ broj: 26/20, 96/20, 1/24).

4.3. Investiciono-tehnička dokumentacija za pribavljanje vodne saglasnosti mora biti urađena na nivou projekta za pribavljanje odobrenja za građenje i u skladu sa uslovima iz ove prethodne vodne saglasnosti te uslovima iz plana aktivnosti sa mjerama i rokovima za postupno smanjenje emisija, odnosno zagađenja usaglašen sa najboljom raspoloživom tehnikom koji je usvojen od strane nadležnog organa.

5. Ova prethodna vodna saglasnost ne oslobađa podnosioca zahtjeva obaveze pribavljanja prethodne vodne saglasnosti za izgradnju lokalne/pristupne saobraćajnice na deponiju i eventualno drugih aktivnosti koje se planiraju izvoditi na predmetnom lokalitetu, a koje su navedene u članu 17. stav (2) Pravilnika o sadržaju, obliku, uvjetima načinu izdavanja i čuvanja vodnih akata („Sl. novine Federacije BiH“ broj: 31/15, 55/19, 41/20, 63/22), a za čije izdavanje je nadležno Ministarstvo poljoprivrede, vodoprivrede i šumarstva Tuzlanskog kantona.

6. Investitor je dužan kod izrade tehničke dokumentacije predvidjeti odgovarajuće mjere da predmetnom aktivnošću, za koje se utvrđuju uvjeti, ne bi došlo do šteta za okoliš ili nepovoljnih posljedica za vodoprivredne interese, a u protivnom je dužan iste nadoknaditi.

7. Po izradi investiciono tehničke dokumentacije u skladu sa uslovima iz dispozitiva ovog rješenja i stručnoj reviziji iste korisnik prethodne vodne saglasnosti dužan je da ovoj Agenciji podnese zahtjev za izdavanje Rješenja o vodnoj saglasnosti na projektnu dokumentaciju za izgradnju nove sanitarne plohe za buduće odlaganje komunalnog otpada na deponiji „Desetine“, Grad Tuzla, a u skladu sa važećom regulativom Federacije BiH.

8. Zahtjev za izdavanje vodne saglasnosti dostavlja se u skladu sa članom 8. i 19. stav (2) Pravilnika o sadržaju, obliku, uslovima, načinu izdavanja i čuvanja vodnih akata. Uz zahtjev se prilaže:

a. Revidovana Investiciono tehnička dokumentacija za aktivnosti na izgradnji nove sanitarne plohe za buduće odlaganje komunalnog otpada na deponiji „Desetine“, Grad Tuzla u skladu sa uslovima iz ovog Rješenja,

b. Rješenje o urbanističkoj saglasnosti i Rješenje o okolinskoj dozvoli - izdata od strane nadležnih ministarstva,

c. Dokaz o uplati administrativne takse u iznosu od 60,00 KM, a prije izdavanja odobrenja za građenje.

9. Ukoliko nakon izdavanja ove prethodne vodne saglasnosti, a u toku pripreme dokumentacije za podnošenje zahtjeva za izdavanje vodne saglasnosti nastupe okolnosti za koje se može pretpostaviti da mogu biti od uticaja na rješavanje zahtjeva za donošenje rješenja o vodnoj saglasnosti, nosilac prava iz prethodne vodne saglasnosti dužan je o nastanku tih okolnosti obavijestiti ovu Agenciju, odnosno kantonalno ministarstvo, prije podnošenja zahtjeva, odnosno obavezno navesti okolnosti u zahtjevu za izdavanje vodne saglasnosti.

10. Ovo rješenje o prethodnoj vodnoj saglasnosti može se izmjeniti ukoliko za to nastupe razlozi utvrđeni u članu 130. stav (1) tačka 1., 2., 3. ili 4. Zakona o vodama, a zainteresirane stranke podnesu argumentiran zahtjev za izmjenu ovog vodnog akta.

Obrazloženje

Investitor, JKP „Komunalac“ d.o.o. Tuzla dana 22.01.2024. godine podnio je ovoj Agenciji zahtjev za izdavanje prethodne vodne saglasnosti u svrhu izrade projektne dokumentacije za aktivnosti na izgradnji nove sanitarne plohe za buduće odlaganje komunalnog otpada na deponiji „Desetine“, Grad Tuzla, a u postupku pribavljanja urbanističke saglasnosti i okolinske dozvole od strane nadležnih organa.

U provedenom postupku dostavljena je i pregledana sljedeća dokumentacija:

A. Opšta dokumentacija:

- Aktuelni izvod iz sudskog registra izdat od strane Općinskog suda u Tuzli – ovjerena kopija,
- Uvjerenje o poreznoj registraciji od 17.04.2014. godine izdato od strane Kantonalnog poreznog ureda Tuzla - ovjerena kopija,
- Zemljišnoknjižni izvadak, Katastarska općina SP:Tuzla, broj:Nar 600/24, Zemljišnoknjižni uložak broj:14441 - ovjerena kopija,
- Kopija katastarskog plana UR broj:07-27-7440/2023-2 od 06.10.2023. godine izdata od strane Službe za geodetske i imovinsko-pravne poslove Grada Tuzla - ovjerena kopija,
- Posjedovni list broj 634, broj:07-27-7440/23-3 od 06.10.2023. godine izdat od strane Službe za geodetske i imovinsko-pravne poslove Grada Tuzla - ovjerena kopija,
- Informacija, broj:06/6-19-13929-2022 GJB od 18.01.2024. godine izdata od strane Službe za prostorno uređenje i zaštitu okoline Grada Tuzla,
- Grafički prilog: Izvod iz prostornog plana TK, broj:06/6-19-13929-2022 od 18.01.2024. godine izdat od strane Službe za prostorno uređenje i zaštitu okoline Grada Tuzla,
- Punomoć podnosioca zahtjeva broj:01-71/24 od 16.01.2024. godine,
- Dokaz o uplaćenju federalnoj upravnoj pristojbi na zahtjev

B. Tehnička dokumentacija:

- Studija za izdavanje prethodne vodne saglasnosti za sanaciju i proširenje postojeće deponije „Desetine“-Lot 1, urađen od strane Enova d.o.o. Sarajevo, decembar 2023. godine. Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa odredbama Zakona o upravnom postupku pokrenuo postupak u cilju utvrđivanja relevantnih činjenica u ovoj upravnoj stvari.

Zahtjev je u skladu sa odredbama člana 21. Pravilnika o sadržaju, obliku, uslovima i načinu izdavanja i čuvanja vodnih akata („Sl. novine Federacija BiH“ broj:31/15, 55/19, 41/20, 63/22), bio oglašen dana 01.02.2024. godine, na oglasnoj ploči Agencije i u dnevnom listu „Oslobođenje“. U postupku oglašavanja nije bilo pisanih izjašnjenja, niti izjašnjenja datih usmeno na zapisnik kod nadležnog organa.

Na osnovu uvida u dostavljenu dokumentaciju utvrđeno je sljedeće:

Nova ploha površine 36.400 m² za odlaganje komunalnog otpada planira da se razvije južno od postojeće deponije „Desetine“ i Velike brane kao nastavak razvijanja donjih brtvenih slojeva prema južnom dijelu deponije, odnosno prema vrhu. Najznačajnije aktivnosti koje se planiraju provesti kod izgradnje nove plohe su:

- priprema površine za novu plohu na način da se izvrši sječa i uklanjanje rastinja, šume, skidanje humusa, ublažavanje postojećih nagiba, nivelisanje površina na koje će biti postavljeni multibarijerni slojevi,
 - ucjevljenje svih povremenih površinskih tokova i Molušskog potoka, kao nastavak na već izgrađeni AB kanal,
 - izgradnja pristupnih internih saobraćajnica do nove plohe,
 - uređenje, čišćenje i uspostava kosina (škarpe) oko internih saobraćajnica i nove plohe,
 - izgradnja obodnih kanala koji služe za sprečavanje površinskog oticanja oborinskih „čistih“ voda sa gravitirajućih površina,
 - izgradnja donje Male brane (zemljane brane) sa maksimalnom kotom krune od 290 m n.m.
 - postavljanje definisanih slojeva multibarijerne zaštite za donje brtvene slojeve i brtvene slojeve na kosinama,
 - postavljanje drenažnih cijevi i spajanje na glavni kolektor PEHD DN 300 mm koji odvodi sve procjedne vode prema laguni i uređaju za tretman procjednih voda,
 - ugradnja vertikalnih bunara za otplinjavanje i povezivanje istih na glavni horizontalni cjevovod za otplinjavanje koji vodi plinove do nove baklje,
 - izgradnja nove žičane ograde na proširenom dijelu ukupne dužine od 680 m, kao nastavak na postojeću ogradu. Također je planirana i nova ulazna kapija na lokaciji postrojenja za tretman procjednih voda
 - čišćenje i održavanje korita recipijenta procijednih i površinskih voda i
 - prekrivanje otpada nakon što isti dosegne svoj projektovani kapacitet. Prekrivanje se vrši inertnim materijalima debljine 50 cm. Nakon čega je neophodno izvršiti ugradnju gornjeg brtvenog sloja i stvaranja uslova za rekultivaciju područja.
- Za potrebe prečišćavanja sanitarno-fekalnih otpadnih voda na lokaciji deponije predviđen je SBR biološki prečišćivač fekalnih voda. Za potrebe kontrole kvalitete ispuštene vode u okoliš nakon tretmana fekalnih voda u SBR uređaju predviđa se monitoring okno, prečnika DN 1.000 mm.
- Prikupljene oborinske vode uvode se u separator zauljenih voda, nakon čega se u oknu za monitoring vrši kontrola kvaliteta i kvantiteta, poslije čega će se prečišćena voda ispuštati u recipijent/okoliš. Za prečišćavanje zauljenih oborinskih voda s asfaltnih površina predviđen je separator ulja i masti kapaciteta 65 l/s sa by passom.
- Prikupljene procjedne vode će se ispuštati kroz okno (koje će se također koristiti za potrebe praćenja) u novi sistem za prikupljanje procjednih voda i do lagune/bazena za procjedne vode, a dalje prema uređaju za tretman procjednih voda (reverzna osmoza). Da bi se ispunio zahtjev za ispuštanje tretiranih procjednih voda u prijemne vode, postrojenje za tretman procjednih voda obuhvata sljedeće glavne korake procesa: egalizacija; biološki tretman; membranska filtracija (reverzna osmoza).
- Na osnovu utvrđenog činjeničnog stanja i dostavljene dokumentacije, a u svrhu smanjenja negativnih uticaja predmetne aktivnosti na stanje voda i prava na vode dodijeljena drugim korisnicima, kao i onemogućavanja degradacije kvaliteta voda, podnosiocu zahtjeva su ovim vodnim aktom, u tački 4. dispozitiva rješenja, shodno odredbama člana 111. Zakona o vodama i člana 5. Pravilnika o sadržaju, obliku, uslovima, načinu izdavanja i čuvanja vodnih akata i odredbama Uredbe o uslovima ispuštanja otpadnih voda u okoliš i sisteme javne kanalizacije propisani uslovi koje je Investitor dužan ispuniti prilikom izrade projektne dokumentacije a koja će Investitoru biti potrebna u postupku pribavljanja vodne saglasnosti i odobrenja za građenje.
- Uslovi za izdavanje vodne saglasnosti definisani su u tački 4. dispozitiva rješenja i isti trebaju biti obrađeni u investiciono-tehničkoj dokumentaciji, koju će Investitor dostaviti uz zahtjev i drugu potrebnu dokumentaciju za donošenje rješenja o vodnoj saglasnosti, shodno članu 114. Zakona o vodama.
- Na osnovu utvrđenog činjeničnog stanja konstatovano je da sa aspekta sektora voda i priložene dokumentacije ne postoje zapreke da se podnosiocu zahtjeva, kao Investitoru, ne

izda tražena prethodna vodna saglasnost, pa je shodno odredbama Zakona o vodama i provedbenim propisima doneseno rješenje kao u dispozitivu ovog Rješenja. Podnosilac zahtjeva je uplatio upravnu taksu od 80,0 KM u skladu sa članom 7. stav 1. tarifni broj 43. Zakona o federalnim upravnim taksama („Službene novine Federacije BiH“, broj 6/98, 8/00, 45/10 i 45/13). Podnosilac zahtjeva je izvršio uplatu po Zaključku broj: UP-1/21-1-40-027-4/24 od 19.02.2024. godine.

Pouka o pravnom lijeku

Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva, putem ove Agencije, u roku od 15 dana od dana prijema rješenja.

Žalba se podnosi neposredno pismeno, usmeno na zapisnik ili preporučeno putem pošte ovom organu i taksira se sa 15 KM administrativne takse prema tarifnom broju 3. Tarife federalnih administrativnih taksi.

Voditelj postupka:

mr. sci. Selma Merdan, dipl.inž.geol.

Po ovlaštenju
Rukovodilac Sektora za izdavanje vodnih akata



Haris Ališehović, dipl. inž. građ.

Dostaviti:

- JKP Komunalac d.o.o.
Husinskih rudara bb, 75000 Tuzla,
- ⊙ AVP-ISV -Vodna knjiga,
- Sektor 40, arhiva,
- Oglasna ploča-AVP Sava